



書



Faint, illegible handwritten text or bleed-through from the reverse side of the page, visible on the left side of the image.

宛陵集為吳樵石先生評點樵石名桐廣字
芑君樵石其號海寧硤石人詩與錢坤一
法。這古諸君注還唱和身後遺書多散佚
予嘗從其孫曉亭見樵石詩稿若干卷
今曉亭沒久矣不知此稿尚存其家否余
歲拜宛陵集亦集五十年矣嘉慶乙申七月
半老人吳騫記於小桐之拜經樓



宛陵先生文集卷第五十五

次韻和池守王微之訪別

君榮初出守我老未東歸病眼生花早蒼毛似葉稀往

還從更少談笑暫相依不及秋鴻翼能隨向楚飛

寄題資州錢固秀才道勝堂

醮壇舊山下高卧一儒生有室羅經籍無心取組纓芋
肥收歲計柑熟摘霜晴暫向京都見添書入蜀城

送黃國博知撫州

逆水乘風上蒲帆滿挂檣日行知幾里江渺不分疆宿
浦隨潮入逢人問路長臨川十萬戶勸勞執壺漿

觀韓玉汝胡人貢奉圖

時世重古不重新。破圖誰畫舊胡人。臂鷹捧盤犀利水。
鐵鎖獅子同麒麟。翹翹雉尾插頭上。深目鉅鼻青搭巾。
塗朱點綠筆畫大。筋骨怒露蠻祠神。茜袍白馬韓公子。
從何得此來秘珍。定應海客遠爲贈。中國未覩難擬倫。
公子自言吳生筆。吳筆精勁瘦且勻。我恐非是不敢贊。
退歸書此任從嗔。

送韓文饒贊善宰河南

退之曾作河南宰。韓氏于今又見君。縣政從來人有望。
家聲不墜世多文。後池分洛貯藍水。高檻看嵩迷嶺雲。
主簿堂前七葉樹。手栽應莫已刳焚。

送刁秘校授漣水主簿歸四明省親

桂得嫦娥枝。婦得黃姑女。直歸東海頭。翁媪笑相語。何
當却之官。古縣入平楚。莫嫌簿書繁。百事由區處。

依韻和永叔戲作

琵琶轉撥聲繁促。學作飢禽啄寒木。木蠹生蟲細穴深。
長啄歛鏗未充腹。擺絃疊響入衆耳。發自深林苔空谷。
上絃急逼下絃清。正如螳螂捕蟬聲。坐中賓歡呼酒飲。
門外客疑將欲行。主人語客客莫去。彈到古樹裂丁丁。
內賓外客曾未聽。乍聞此曲無不驚。還憶昭君入胡虜。
烏孫帳下邊馬鳴。安知如今有樂事。能使女奚飛玉觥。
女奚年小殊流俗。十月單衣體生粟。言事關西楊廣文。
廣文空腹貪教曲。曲奇譜新偷法部。妙在取音時轉軸。

翰林先生多所知。又笑畫圖收滿屋。不肯那錢買珠翠。
任從堆插階前菊。功曹時借乃許出。他日求觀龜殼縮。
我嗟老鈍不如渠。幸得交朋時借娛。但樂休計有與無。

○ 送吳仲庶殿院使北

漢朝重結單于好。歲遣名臣禮數增。紫鼠皮裘從去著。
飛龍廢馬借來乘。天寒將遇磧中雪。鼻息暗添髭上冰。
定見南鴻起歸思。家書欲寄不堪憑。

○ 送呂冲之司諫使北

虜人多竊朝廷禮。譯者交傳應對辭。羊酪調羹尊漢使。
檀堂舉酒見關氏。矇矇白日穿雲出。漉漉黃沙作霧吹。
知去燕京幾千里。胡笳亂動月明時。

送孫隱之都官通判秀州

柳條枯落盡。不折意徘徊。泛汴趨殘水。到吳看早梅。無
耽聽鶴唳。有信寄鴻來。聞說閭亭改。靈光化劫灰。

○ 依韻和王平甫見寄

兄為太守兩輪朱。仲泛吳人燕尾鱸。且看洞庭多橘柚。
莫懷江國有枌榆。少游山水殊非俗。老愛詩書又似愚。
百事輸君休問我。風沙不比在雲湖。

○ 得王介甫常州書

斜封一幅竹膜紙。上有文字十七行。字如瘦棘攢黑刺。
文如溫玉爛虹光。別時春風吹榆莢。及此已變蕪葭霜。
道途與弟奉親樂。後各失子懷悲傷。到郡紛然因事物。

舊守數易承蔽藏。搜姦證繆若治絮。蚤蝨盡去煩爨湯。
事成條舉作書尺。不肯勞人魚腹將。魚沈魚浮任所適。
偶爾及我為非常。勤勤問我詩小傳。國風纔畢葛屨章。
昔時許我到聖處。且避俗子多形相。未即寄去慎勿怪。
他時不惜傾箱囊。知君亦欲此從事。君智自可施廟堂。
何故區區守黃卷。蠹魚尚恥親芸香。我今正值鴈南翔。
報書與君倒肺腸。直須趁此筋力強。炊粳烹鱸加桂薑。
洞庭綠橘包甘漿。舊楚黃橙綿作瓢。東山故游攜舞孃。
不飲學舉黃金觴。谿如罨畫水泱泱。刺船靜入白鷺傍。
菱葉已枯鏡面涼。月色飛上白石牀。坐看魚躍散星芒。
左右寂寂夜何長。烏棲古曲傳吳王。千年萬年歌未央。

莫作腐儒鍼膏肓。莫作健吏繩餓狼。儻如龔遂勸農桑。
儻如黃霸致鳳皇。來不來亦莫愛嘉祥。

司馬君實遺甘草杖

美草將為杖。孤生馬嶺危。難從荷篠叟。寧入化龍岐。去
與秦人采。來扶楚客衰。藥中稱國老。我嬾豈能醫。

逢雷太簡殿丞

長安初見君。君領微有鬚。後於河內逢。秀俊美顏胡。又
會在桐鄉。談詩多孟盧。學書得天然。鐘王不能奴。荏苒
三十載。邂逅遇京都。朝接北扉飯。暮應西垣呼。坐中如
夢寐。相語故人無。昔由處士召。胸懷開廟謨。今看髭已
白。議論恥非夫。拜章陳時事。皆與相意符。其識固不淺。

其用當亦殊人多惜老大我復歎羈孤終朝重相笑為君傾酒壺

雷太簡遺蜀鞭

蜀道山之峭壁兮如快刀一削平無痕其間春雷驚龍走竹根迸石垂虺尾骨節瘦密風霜吞野夫采之絕懸蔓分寸脫死持還奔他人不可得此物乃重太守公侯孫獻來一錢不肯要只乞斗酒抱歸村太守立性豈諂賢將贈故人唯義存我騎瘦馬固莫稱破韉爛轡沙塵昏明日試執趨君門孰不怪視竊笑言

得雷太簡自製蒙頂茶

陸羽舊茶經一意重蒙頂比來唯建溪團片敵湯餅願

渚及陽羨又復下越茗近來江國人鷹爪夸雙井凡今天下品非此不覽省蜀薜久無味聲名謾馳騁因雷與改造帶露摘牙穎自煮至揉焙入碾只俄頃湯嫩乳花浮香新舌甘永初分翰林公豈數博士冷醉來不知惜悔許已向醒重思朋友義果決在勇猛倏然乃以贈蠟囊收細梗吁嗟茗與鞭二物誠不幸我貧事事無得之似贅癭

送呂寺丞希彥邠州僉判

自有仲宣樂從軍仍近親關河歷周鄭風雪過咸秦原上方驅馬鞍傍忽起鶉世家傳釣玉重問渭川濱

送施司封福建提刑

命使得才臣。欽刑聖主仁。銅苗休問發。田種去教親。白
茗出溪上。紅蕉連海濱。輕車莫道遠。詔意重生民。

江鄰幾暫來相見去後戲寄

低頭拜我蒼顛翁。來如飛鳥去如風。一夕共飲斗柄北。
平明已向函關東。衆中舊騎跛鼈馬。塞下新買連錢驄。
疾驅似逐鄧林日。不肯暫住行何窮。

送徐無黨歸婺州

吳蠶吐柔絲。越女織美紉。機杼固已勤。刀尺誠獨難。裁
縫失分寸。長短爲損殘。嘗聞仲山甫。能補帝袞完。袞完
民衣足。天下無苦寒。徐從信都學。染翦宜弃冠。彼實山
甫徒。爾亦非粹剡。東歸道自勝。人誰故時眷。

依韻和永叔內翰酬寄揚州劉原甫舍人

東望淮海間。恨無鴻鵠羽。鴻鵠日已飛。風雪歲將暮。憶
聽談老莊。達生無恐懼。我今齒髮疎。何異樹有蠹。辭別
不必道。俛仰已成故。書問雖惟爲。夢寐則往屢。乘桴思
仲尼。好勇慙季路。願希隆中臥。不是邀三顧。二公廊廟
才。酬寄封尺素。皋夔久相稱。舜禹時已遇。舉杯向明月。
此意聊可寓。

8 和韓欽聖學士襄陽聞喜亭

亭欄下望漢江水。淨綠無風寫鏡明。日脚穿雲射洲影。
槎頭擺子出潭聲。檣帆落處遠鄉思。砧杵動時歸客情。
使者徘徊有佳興。高吟不減謝宣城。

許仲塗屯田以新詩見訪

許氏世工詩，渾堂格力微。獨能兼古律，無不是珠璣。捧卷光蓬室，停車照竹扉。陽春復高調，自昔和人稀。

荅祖擇之惠黃雀鮓

李白勸爾莫逐炎洲翠，亦莫近吳宮燕。爾不聽我言，禍患今乃見。吳火時雖無，越羅日生變。空知稻粱肥，豈悟杯盤薦。我不聞爾聲，謬成先生饌。咀嚼勿言非，雉鴈猶充饌。

覽顯忠上人詩

昔讀遠公傳，頗聞高行僧。廬山將欲雪，瀑布結成冰。尋跡數百載，歷危千萬層。師來笑賈島，只解詠嘉陵。

依韻和吳長文舍人對雪懷永叔內翰

紫禁低雲拂綺櫳，西垣人憶玉堂翁。撚髭覓句方傳詠，著樹成花尚舞空。不管因風吹塞外，任教飛片落杯中。曉來城郭遮無路，阮籍驅車莫歎窮。

送王巖夫秘校通判滑州

昔聞信都侯，嘗作畫舫齋。空戶兩向闢，尊席長對排。左顧樹若岸，右盼堵成崖。既無風波虞，但與物景諧。一從信都去，來者趣意乖。屋室改庫廩，花木爲薪柴。君當訪其蹟，更葺安舊碑。記石儻尚在，塵土加洗楷。然後釀井泉，吟醉前人偕。寄言靈河守，高此別乘懷。

和宋次道荅弟中道寄懷

陸家兄弟苦西東。黃耳傳書近已通。共歎流年同轉轂。各驚華髮似飛蓬。河冰夜合知霜勁。塞霧朝開見日紅。臘盡春來又相遠。江南江北望歸鴻。

元日閤門拜表遇雪呈永叔

六花隨表拜東廂。庭下遙呼萬歲長。王會圖中陳壁馬。漢官儀裏濕旂常。因風亂絮霑螭首。似鵠輕毛落井牀。素髮垂冠少顏色。衆人休笑老爲郎。

王樂道太丞立春早朝

近臣頭上黃金勝。殿前拜賜東風應。蓂莢疏甲簇春盤。肉抹長絲何亘亘。寬衣武卒舉至庭。人歸下箸殊難稱。我家無火甑生塵。幪柳綵花空著興。空著興將底爲。但

願得米資晨炊。不管飛霰與麥宜。千官隊中身最卑。五日一謁前旒垂。

上元夕有懷韓子華閣老

一歲老一歲新年。思舊年東樓嘗共望。九陌聽爭先。白髮更中笑。舞姝應轉妍。追隨都已倦。強對月明前。

錢君倚學士日本刀

日本大刀色青熒。魚皮帖櫛沙點星。東胡腰鞘過滄海。舶帆落越棲灣汀。賣珠入市盡明月。解條換酒琉璃餅。當壚重貨不重寶。滿貫穿銅去求好。會稽上吏新得名。始將傳玩恨不早。歸來天祿示明游。光芒曾射扶桑島。坐中燭明魑魅遯。呂虔不見王祥老。古者文事必武備。

今人褻衣何足道。干將太阿世上無。拂拭共觀休懊惱。
○ 依韻和杭州梅龍圖入懷見寄

東都車馬苦飛霾。南國桅帆喜過淮。船背插旗風自展。
沙頭迎浪雪相排。白魚已薦糟增味。紅稻新炊粟馱懷。
定似謝公迎遠岫。錢塘應合有高齋。

○ 送周直孺秘校和州都曹

箭頭破賊棄不爲。筆端射策取桂枝。殿前脫袍改舊色。
庭下折腰甘去時。歷陽郡小太守好。督郵官閑衆吏嬉。
江邊竹園啼竹雞。竹裏種花春過遲。東望望夫雲脚垂。
煙雨隔岸風檣鼓。濕鴈不起沙上嘶。君思歷亂如盎絲。
宛陵先生文集卷第五十五

宛陵先生文集卷第五十六

送謝師厚太博通判汾州

嘖官吳越飽秔稻。况住南陽多水田。北登太行入汾曲。
正獲穰穰秋風前。晉人朴厚自寡訟。軟炊玉粒何鱗鮮。
君方少壯齒頰健。甘美不負經腹便。有意南飛寄我信。
滿川鳴鴈下連連。

依韻和永叔都亭館伴戲寄

去年鑊宿得聯華。二月牆頭始見花。今日都亭公感物。
明朝太學我辭家。

送李君錫學士使契丹弔慰

昨日匈奴來告哀。殿門不識桃花開。今聞君去作弔使。

正值鴈嗥從北迴風卷黃雲無遠近山留白雪猶枯菱
歸看車馬汗流沫逃暑為傳河朔杯

○送邵裔長洲主簿

姑蘇城頭烏哺時長洲草綠春袍歸魯桑葉小蠶出遲
吳田水暖牛耕肥里胥爭迎縣察喜入門先自易綵衣
拜親然後及王事簿書豈得長相鞿

○送薛公期比部歸絳州展墓

風雨梨花殘松柏墓門晚嗣子千里駒羊腸九折坂春
裘不畏寒行路未為遠舊來河內守父老將衣挽

○送次道學士知太平州因寄曾子固

春浦楊花撩亂飛春江鮎魚來正肥采石新林兒女去

菱白蒲牙艇子歸歸令煮魚不得熟已望使君船上磯
上磯亦不待潮應爭牽篾纜泥汙衣姑熟溪頭槌大鼓
紅抹鞞刀趨俯僂牙兵可擬岸傍蘆森森甲立雄南土
更得西州謝法曹新咏定多傳樂府

依韻和劉原甫舍人楊州五題

時會堂二首

歲貢蜀岡茶似蒙
頂茶能除疾延年

今年太守采茶來驟雨千門禁火開一意愛君思去疾
不緣時會此中杯
雨發雷塘不起塵蜀崐岡上煖先春煙牙才吐朱輪出
向此親封御餅新

○西竹西亭

結雨竹西若若川揚州歌吹思當年劉郎若向風前唱
夢入青樓事惘然

○ 春貢亭

夢谷浮船穩且平泊登岡頂看茶生始從官屬二三輩
時聽春禽一兩聲

○ 蒙谷

茗園葱蒨與山籠一夜驚雷發舊叢五馬留連未能去
土囊深處路微通

○ 崑丘

寺即煬
帝離宮

隋家宮殿昔初成不道荒涼獸迹行今日知來高處望
山川興廢使人驚

○ 送江陰僉判晁太祝

去無珠履為上賓進船申浦憶春申江田插秧鶉姑雨
絲網得魚雲母鱗青天折桂香未滅紫豉煮莼甘更新
平時况可樂風月吳物信美聊前陳

○ 送晁質夫太守知深州

蕪葦問古亭春入饒陽城豆粥君王遠壺漿刺史迎地
涼宜牧馬塞近慣調兵為寄井泉石老來思目明

○ 送少卿知宣州

先歸
書上

汴水清明下宣城太守行鴨頭吳蕩綠燕尾楚船輕族
本三陽重詩從小謝清州民還最喜門下舊通名

送朱表臣職方提舉運鹽

蜃竈煮溟渤航鹹播楚越官權利言盈盜販弊相汨連
艘以轉致攪灰或沈沒雖使日鞭黥未易窮姦窟朝廷
用朱侯提職欲無闕侯因許專畫拜跪陳其說曰臣有
更張敢以肝膽竭荆湘嶺下城恃遠不畏罰堂堂事私
賈遮吏遭驅突願使商自通輸金無暴猝淮江且循常
約束備本末國用必餘貨亭民無滯物事下丞相府論
議不可拔從之東南蘇拒之財賦遏聽侯侯往施所便
黔黎活五味既和調萬里銷狂悖汴水桃花時犀舟順
流發過淮逢絮鮒泊岸採蘆蕨挂帆趨浪頭應不勞歲
月

依韻和李君錫學士北使見寄

行色見車馬爲之具壺觴暫辭甘泉宮遠奉左賢王蒙
茸春裘薄匝匝金絡光唯知君命重不數沙路長魯酒
雖入脣胡笳易迴腸歸來立螭頭言動書不忘

送張山甫秘校歸緱氏

去年來折桂今年來娶婦得意春風前還家寒食後蓬
巷鬧雞犬藤花蔭井臼緱山白醪醇重酌高堂壽

送江東轉運楊少卿

世言楚使者乃是漢名卿曾欲察黃綬但能勤列城江
山無改故草樹幾更榮有意息民甚不同羨盈

宜春宴射篇李駙馬請賦雜言

風雨未過桐華時宜春苑中梨萼披天子賜宴羣臣嬉

少年都尉方追隨暮歸遲喜聯留後兄弟雙弓射熊皮
侯宗戚族坐上少伯仲相顧驚恩私鳳皇樓高玉簫吹
金絡駁馬不肯騎自戒危溢作後規何郎莫媿書與詩
送王樂道太丞
相如既擊劍仲宣亦從軍二人當其時皆以能賦聞韓
公守武垣犀兵若屯雲幄中欲寄畫才智莫有君請之
天子所朝奏夕離羣爲沽斗酒飲爲買赤鯉焚魚盡酒
亦盡醉起衣袂分

送楚屯田知扶溝

客亭多少路花信幾番風折柳贈新翠種桃思舊紅淵
明節已異潘岳趣還同政治有餘力歸來辭賦工

呂山人同荆供奉見過

街上春泥踏始開山人忽同供奉來老怒行遲報我晚
怒氣欲拔庭中槐聞說道心調伏久等閑休要起嫌猜

觀劉元忠小鬟舞

桃小未開春意濃梢頭綠葉映微紅君家歌管相催急
枝弱不勝花信風

次韻奉和永叔謝王尚書惠牡丹

大梁有公子洛陽有游俠昔時意氣相憑陵不問興亡
事栽插栽紅插綠鬪青春春風與開春雨颺兩都富貴
不相殊走馬尋芳何合雜只聞年少競爭先摘葉齧花
身更捷安知遺愛舊留守馳獻百葩光浥浥尚書最重

歐陽公盈盤分去蜂偷獵。但能為樂飲醇酒。何必署名黃紙牒。翰林職清文字稀。不比外官煩應接。曩公為花曾作譜。端相用意隨蝴蝶。擬王擬妃姚與魏。歲歲年年千萬葉。還將顏色定高低。綠珠雖美猶為妾。從來鑒裁主端正。不藉娉婷削肩胛。舊品既著新品增。偏惡妒芽須打拉。嘗憶同朋有七人。每失一人淚緣睫。唯我與公今且存。無復名園共攜榼。公因尚書戴紅紫。白髮欺公生匝匝。磨墨揮毫興不衰。作詩坐使劉曹怯。副本能傳幸一觀。口誦舌搖徒囁囁。

送王郎中知江陰

持歸漢省青綾被。去看吳都白馬潮。疊鼓渡江寒浪伏。

鳴鏡入境野雲飄。魚穿楊柳誇鮮膾。人采芙蓉學細腰。家有二槐為太守。弟兄誰似李文饒。

送閻仲孚郎中南游山水

蜀山難於上青天。聞之李白為舊傳。蜀客往返曾又然。奇峰又與三峽連。巫陽神女暮為雨。飛入楚臺王夢旃。相如揚雄不道此。宋玉景差其賦偏。西州才子邯鄲守。懷章往代尚踰年。家住岷峨多此宦。乘閑因借下江船。未浮洞庭沅湘去。還探禹穴希馬遷。春申樓觀已不見。子胥怒濤猶滿川。錢塘太守同鄉里。一見君來顏已喜。甘饌香脆與君游。詩貯篋囊攜不起。浣沙溪頭西子家。自尋錦石菖蒲花。埽歸成都與士誇。君平曾已悟星槎。

次韻和永叔嘗新茶雜言

自從陸羽生人間。人間相學事春茶。當時採摘未甚盛。或有高士燒竹煮泉爲世誇。入山乘露掇嫩觜。林下不畏虎與蛇。近年建安所出勝。天下貴賤求呀呀。東溪北苑供御餘。王家葉家長白芽。造成小餅若帶銚。鬪浮鬪色頂夷華。味久迴甘竟日在。不比苦硬令舌宓。此等莫與北俗道。只解白土和脂麻。歐陽翰林最別識。品第高下無敲斜。清明開軒碾雪末。衆客共賞皆稱嘉。建安太守置書角。青翦包封來海涯。清明纔過已到此。正見洛陽人寄花。兔毛紫盞自相稱。清泉不必求蝦蟇。石餅煎湯銀梗打。粟粒鋪面人驚嗟。詩腸久飢不禁力。一啜入

腹鳴咿哇。

次韻再和

建溪茗株成大樹。頗殊楚越所種茶。先春喊山栢白萼。亦異鳥觜蜀客誇。烹新鬪硬要齧盞。不同飲酒爭畫蛇。從揉至碾用盡力。只取勝負相笑呀。誰傳雙井與日注。終是品格稱草芽。歐陽翰林百事得精妙。官職况已登清華。昔得隴西大銅碾。碾多歲久深且宓。昨日寄來新鬪片。包以籐筩纏以麻。唯能賸啜任腹冷。幸免酪酏冠弁斜。人言飲多頭顫挑。自欲清醒氣味嘉。此病雖得優醉者。醉來顛踣禍莫涯。不願清風生兩腋。但願對竹兼對花。還思退之在南方。嘗說稍稍能啗蟇。古之賢人尚

宛陵先生文集卷五十六
若此。我今貧陋休相嗟。公不遺舊許頻往。何必絲管喧
咬哇。

送許當職方通判泉州

乳鳥不遠飛。乳獸不遠遊。異類尚有戀人。獨安所求許
侯。恰爲郡。乃甘貳一州。得以奉雙親。時物供膳。羞竹箭
水順疾。紅旗插歸舟。歸舟莫苦急。睢陽多舊儔。丞相正
喜士。尊酒應爲留。清源六千里。到日魚蟹秋。

宛陵先生文集卷第五十六

宛陵先生文集卷第五十七

送葛都官南歸

不羨新爲赤縣尹。惟羨暫向江南歸。江南幕幕梅雨時。
風帆差差並鳥飛。曾竿夾岸長若桅。水籠畜魚鮮且肥。
家在千古溪上。先應喜鵲噪門扉。

楊樂道留飲席上客置黃紅絲頭芍藥

洛陽賣牡丹。江都買芍藥。賣與富人歡。買爲游子樂。萬
絲必同心。千葉必同萼。五色相淺深。百金相厚薄。栽培
動經年。風雨便成昨。蕭條洛陽城。索寞江都郭。賴有一
春花。能無十千酌。朝看門擁車。暮見門羅雀。嘗聞月底
人。欲把月桂斫。要使清光多。四海意開廓。我亦愛明月。

常滿不願落。上弦過楊侯。乃值寒雨作。共飲三四人。不覺傳鳴柝。持葩金谷豪。朱黃何灼爍。還思溱洧上。士與女相謔。實此香草芳。請我賦其略。酒闌為追詠。思拙筆屢閣。

項羽

羽以匹夫勇。起于隴畝中。遂將五諸侯。三年成霸功。天下欲滅秦。無不慕強雄。秦滅責以德。豁達歸沛公。自矜奮私智。奔亡竟無終。

送陳郎中知和州

藹藹尚書郎。出為二千石。伯父歷將相。兄弟皆烜赫。前罷永嘉守。民俗遮阡陌。獨將海松歸。夸與都下客。今去

烏江邊。寂寞空舊跡。當求虞姬草。無風舞隨拍。城頭可曠望。千里波月白。俱助使君歡。平時遺吏責。

送薛十水部通判并州

并州自古近胡地。牛酒常行十萬兵。少尹曾為五府辟。將軍況有舊家聲。桑麻故已知風俗。丘隴何須訪姓名。聞說至今猶好馬。試求安穩衆中行。

寄題西浴致仕張比部靜居院四堂

張侯歸靜居。堂宇結四隅。堂中何所有。書畫羅籤厨。四堂各異名。名異義亦殊。夷心與會真。內以道德娛。清白及金蘭。外為子孫模。西南夜落蟾。東北朝生烏。天門風相通。盛衰理可無。舊爾松檜樹。間之花石株。雨晴氣候

佳鄰里或來俱遣摘班林筍共持香秬盃飯畢循徑行
不使僮僕扶所至舊衣坐遍歷日過晡時遇園果熟甘
漿而粉膚就技掇鮮美咀味銷冰酥以此樂歲月豈是
忘形軀禮法不我棄勞吝不我紆上不媿二疎下不泛
五湖自有逍遙趣幸世遭唐虞

○送洪祕丞知大寧監

三峽蠻溪上千山楚俗兼婦人樵入市官井貨專鹽魑
魅或為患獼猴常可嫌君能厚風化男子使腰鎌

○送江西轉運馮廣淵學士

五月江南行南風江惡遡乘潮雖有信不過湓城去船
經香爐峰峰前須暫住三年少尹勞始得看瀑布到官

未必閑舉察憂財賦迴思廬山傍塵土已生慮尚存滕
王閣無忘一登顧

○依韻和永叔景靈致齋見懷

翰林文字本雄強况復齋祠向靜坊高樹黃鸝無去意
深廊朱幕動微涼不嗟門外塵沙苦只覺壺中歲月長
庭下陰苔未教埽榴花紅落點青蒼

雜言送當世待制知揚州

馮

廣陵老人爭持壺酒朝言送少年使君暮言迎少年太
守少年俱是玉墀人文章快利生銅吼莫作蕪城賦事
往復何有莫聽嵇康琴商聲豈堪久今當太平非不偶
星宿煌煌羅北斗揚州古富變荒涼萬俗一心依父母

地包淮海江湖寬。貨走荆吳楚。越厚開釀。剗羊願遇賓。
天下云云不輕口。

送蘇公佐屯田知單州

柏上有羣鳥。一鳥飛向東。方樓城頭與人司。吉凶八月
禾已穫。九月黍已舂。竟持美酒相慶樂。年豐借問何能
爾。時平無困窮。

王平甫惠畫水臥屏

臨流別君時。羨君觀吳潮。君行識我意。遣畫一幅綃。畫
作繞牀屏。滔滔隨驚飈。前浪雪花卷。後浪白馬跳。宛然
千萬重。不似筆墨描。窳亞亂我目。坐臥疑動搖。夜燈照
河漢。如有織女招。朝日下天窗。東海無秦橋。秦橋不可

度。織女不可邀。但慕乘桴公。空能誦唐堯。嘗聞挾柘彈。
意必在食鶚。終當五湖上。歸去學漁樵。

送萬州武寧段尉

希元

相見三十載。喜君始成名。新袍照江綠。白髮憎鑑明。臨
水必觀魚。獨傷魚命輕。朝為淵底游。暮為釜中烹。彼方
路艱遠。其民亦天氓。餒之則為盜。非是惡厥生。捕多勿
夸能。能在不犯兵。

次韻荅黃介夫七十韻

春風不擇草。萬卉皆發萌。盛夏一長養。秋實俱與成。春
粒以蒸炊。刈枯以煎烹。工師調五音。不問咸與諛。自取
衆律和。黍谷動華英。可以薦祖廟。可以陳帝庭。良將統

萬卒所向若驚霆。戰鬪衆益勇。號令夜益明。破敵必拉朽。不見堅陣橫。我觀欲物際。亦在農力興。我觀合奏時。亦在考擊并。我觀成功日。亦在間得情。草木有美惡。造化無喜憎。五聲有高下。一致不可評。三軍用貔虎。不較蚊睫螟。大君設時網。廣海無漏鯨。磊落黃夫子。爲學不自輕。四十登賢科。良賈售百朋。得志豈計晚。成名等衆榮。舊交半存歿。新知慕徒傾。老鶴晴一唳。隨風無近聲。好論古今詩。品藻笑鍾嶸。欲埽李杜壇。未審誰主盟。我衰百事倦。白首聊窮經。兩目生昏花。猶勝張籍盲。讀書愛日永。秉扇自驅蠅。但惡亂我思。非與小物勍。清飈颯然來。喜得如弟兄。散帙空堂上。垂冠髮星星。載誦堯舜

篇。幸今時太平。不學遁世士。投竿泛東溟。不襲貪生人。煉氣喻日精。不羨富貴翁。歌吹滿重城。獨守螢火光。莫擊蟾蜍晶。人生轉頭間。未免一銘旌。區區逐甘鮮。鼎鼎夸佩纓。安知西山餓。孰識縣上耕。彼勿歎鳳衰。此正歌鴻冥。分合歿窮巷。迹澀蹈高閔。妻子易爲飽。粟帛不足營。豈乏一器飯。豈乏一杯羹。肯爲濁河濁。願作清濟清。韓愈嘗有言。百物皆能鳴。特稱孟東野。貧篋文字盈。到死只凍餒。何異埋秦阮。今我已過甚。日醉希步兵。神仙多羽翼。一一飛蓬瀛。乃知無道氣。難可強留形。鄙性實樸鈍。曾非傲公卿。昔隨衆一往。或值謗議騰。曰我非親舊。曰我非門生。又固非賢豪。安得知爾名。是時聞此言。

舌直目且瞠。俄然我有荅。賢相持權衡。喜士同周公。其德莫與京。我去豈不送。我往豈不迎。自為筋力寡。路遠艱於行。未若歸教子。遺金徒滿籩。歲月苦易得。顏貌日可驚。身雖厭役役。心亦遠磴磴。歸思吳州橘。夢憶楚江萍。試看兩圍碁。白黑何所爭。朝脫泥塗困。暮失雲衢亨。物理既難常。達生重飛觥。曾以文豹章。遠喻子懷能。曩者恃貴勢。悔說烏鳥靈。烏靈反見怒。終恨屈此誠。當時語頗錯。盍呼為大鵬。於茲儻遇之。應解頸頰頰。韻盡意未盡。且用此報瓊。

永叔內翰見索謝公遊嵩書感歎希深師魯子聰幾道皆為異物獨公與余二人在因作五言

以敘之

昔在洛陽時。共遊銅駝陌。尋花不見人。前代公侯宅。深堂鏤塵埃。空壁鬪蜥蜴。楸陰布苔綠。野蔓纏石碧。池魚有偷釣。林鳥有巧射。園隸見我來。朱門暫開闢。園婦見我還。便埽車馬跡。何以埽馬跡。實亦畏他客。我輩唯適情。一葉未嘗摘。他人或所至。生果不得惜。又憶遊嵩山。勝趣無不索。各具一壺酒。各蠟一雙屐。登危相扶牽。遇平相笑噓。石擣雲衣輕。巖裂天窗窄。上飲醒心泉。高巔溜寒液。下看峰半雨。廣甸飛甘澤。夜宿岳頂寺。明月入戶白。分吟露氣冷。猛酌面易赤。明朝循歸塗。兩脛痛若刺。日盱就馬乘。香草路迫阨。却望峻極居。已與天外隔。

薄暮投少林。漱濯整冠幘。碑觀巡幸僧。指古定空壁。擔
將新詠章。燈前互詆摘。楊生護已短。一字不肯易。明年
移河陽簿書。日堆積。忽得謝公書。大夸遊覽劇。自嵩歷
石堂。蘚花題洞額。其文曰。神清固非人。筆畫乃知二公
貴。逆告意可蹟。遂由龍門歸。里埃環數驛。我時詩已荅
或歌。或辨責。責我不喜僧。性實未所獲。凡今三十年。纍
冢拱松柏。唯與公非才。同在不相同。昔昔日同少壯。今且
異肥瘠。昔日同微祿。今且異烜赫。昔同騎破韉。今控銀
轡革。昔同自謳歌。今執樂指百死者。誠可悲。存者獨窮
厄。但比死者優。貧存何所益。

送謝師直祕丞通判莫州兼寄張和叔

河湟宿兵地。勁勇天下聞。侵疆古甚熾。薄伐詩所云。往
今勢且異。利害理頗分。遠以塘設險。遂輕甲屯雲。昔傳
嘗膽國。能破怒蛙軍。越雖隔大江。吳遭若枯焚。實由恃
阻懈。抉目悲伍員。夫子負美才。議論高不羣。况有令兄
弟。今亦貳河汾。助守戒不虞。慎勿倚和獯。張侯為刺史
大族。獨此君法明。而不苛。可共飾以文。

送白秀才福州省親

士憂行不脩。不憂祿不及。之子久好學。何患名未立。聖
時開賢科。子獨不肯入。固非遠仕進。服期難赴集。南歸
慰親顏。道路正暑濕。悠悠幾千里。赤日薄行笠。暫憩青
林下。賴有寒泉汲。漱齒去塵埃。土風須漸襲。

送温州楚屯田

鴈蕩山顏鴈如隨太守來。秋風既與至，春日定同迴。上宰無忘舊，明時必用才。白於章句老，經冊向螢開。

送僧在已歸秀州

前歲嘉興火，僧居化劫灰。四方持鉢去，千里渡江來。心向王城講，緣從海客迴。水天聞唳鶴，不復有塵埃。

送祖印大師顯忠

黃紙賜祖印，鑄名不鑄金。力笑蘇季子，責望小人深。渡江見海月，秋光上遙林。團團冰玉盤，瑩然如禪心。

題譯經院同文軒

有書無異文，有車無異軌。貝多得剎行，白馬來萬里。清

軒延高僧，一歲譯幾紙。譯罷坐焚香，庭草灑寒水。

和江鄰幾學士得雷殿直墨竹二軸

昔見雷子之小篆，今見雷子之墨竹。節瘦已似蛟龍孫，葉暗曾無鳳皇宿。江翁得之尤愛憐，作詩寫意酬雙軸。挂在空堂坐臥看，如玩蕭蕭巖畔綠。莫疑昏黑眼生花，松煤濃色切寒鴉。不問主人兼客至，明朝騎馬到君家。

永叔內翰見過

我居城東隅，地僻車馬少。忽聞大尹來，僮僕若驚鳥。入門且坐笑，豐頰光皎皎。問我餐若何，依舊抱糜麩。問我詩若何，亦未離纏繞。我庭有藜莧，不堪秣驥裊。我壺無醪醴，不能犒介召。乃喜百事稀，來此與世矯。固非傲不

往心實厭擾擾

○韓子華內翰見過

但見公軒過未見我馬去我懶宜我嫌公曾不我惡秋
雨天街涼蕭蕭入槐樹遙聽高車聲騶導門前駐僕夫
驚入扉遽曰能來顧度量何其宏始終不改遇索以新
詩章徧覽日欲暮誠慙兜離音唐突韶與濩明朝當負
荆人莫譏貴附

送董察推赴江寧

金陵從事去不歎食無魚尺鯉日登俎故鄉時得書衰
荷摘短袂秋蘚曳長裾若見府公問年來嬾更疎

○次韻和司馬君實同錢君倚二學士見過

棲棲太學官日厭塵坌積朋游絕經過都未昧相識幸
得養疎慵不能事役役天京二賢佐向晚忽來覲笑我
似盧仝環然空四壁只欠長鬚奴訴尹惡少摘移榻近
簷楹談詩俄至夕迴車閭巷隘跛馬愁所歷平明看蒼
苔已覺生轍跡

○次韻和錢君倚同司馬君實二學士見過

府僚忽方駕乃知決訟餘大尹不苛察羣吏不牽拘嘗
稱二三賢助治無偏隅新晴乘此涼行行過我居何以
延君子唯有滿牀書何以解君頤淡句無足娛何以留
君久燈燭已照塗登車莫言遠騶從美且都夾道行人
止按轡寧馳驅我老焉所羨送子立躊躇

送閬州駐泊荆供奉

青天不可上蜀道未嘗行每說褻斜險唯聞猿鳥聲去
為千里客自握一方兵所重恩威立無將遠戍輕

江鄰幾沈文通二學士見過

東城車馬多巷無蹄與轍如何二賢豪侵晨顧衰茶喜
言雨後涼早暮脫炎熱愛子屋室靜塵土都已絕不唯
清耳目亦粗養愚拙江碑讀頭陀沈賦嘗雌霓固知世
德高學問冠時哲我慙於其間荆華參蟻垤然推鵬鷁
分自足不少別君歸邀此吟把筆強搜抉

送壽州司理張元輿

清川夜流明月光城上有烏啼女牆月明不掩斗與氣

烏啼未歸雲點霜霜寒月冷古時獄下有苔蟲之雄鋸
水方軒眉大靈智見我西北天門傍自言昔有切玉寶
嗟今非後百鍊鋼用之補履亦何益穎脫未如錐處囊
誰能為封華陰土背負七星生焜煌君去味我書此意
莫歎淮水來湯湯

宛陵先生文集卷第五十七

宛陵先生文集卷第五十八

吳長文紫微見過

豈敢以貧賤而輒傲賢貴但恨門闌遙赫日去可畏瘦
馬汗常流寸步出無謂是以逾十旬景慕腸欲沸近因
秋雨來纖纖有涼氣九陌可以行輕服可以衣方將事
請見瘡足痛若跣忽枉騶騎過顏厚言莫既尚期新醪
熟還往襲經緯乃知君子德曩分替則未

范景仁紫微見過亦謁不遇道上逢之

朝游翔鳳池暮直中書省無由見顏色况乃當畏景退
朝八月朔因得修造請高閣一何新未歸閭巷靜版刺
留姓名不遑佇軒屏驅馬返我廬道逢騶從整斂轡莫

敢行顧望立俄頃還家稚子言有車來炳炳傳是紫微
人將迴猶引領如何互相乖徒自想形影更待秋風高
緩步時往省

送王道粹學士知亳州

古者二千石高車駕青驪車前陳曲蓋車後建朱旗金
鼓鳴兩旁壺漿擁通達所付重威惠所仰撫惇嫠景毫
實鉅屏往俾國相之國相稱疾還正值民阻飢朝廷急
恤養選守莫與宜君嘗典海陵政績為衆推今授輒辭
命大夫多飛綏屢上不得請飭馭俄輕齋既體堯舜仁
又荅稷禹知八月風漸高木葉將披披郊原棗已剥場
圃黍可治必期寬賦斂無乃息疲羸何當過苦縣肯暇

觀舊碑

和江鄰幾學士畫鬼拔河篇

蒲中古寺壁畫古畫者隋代展子虔分明八鬼拔河戲
中建二旗觀却前東廂四鬼苦用力索尾拽斷一鬼顛
西廂四鬼來背挽雙手碰下抵以肩龍頭魚身霹靂使
持鉞鎮立旗左偏拔山夜又右握斧各司勝負如爭先
兩旁搥鼓鼓四面聲勢助勇努眼圓臂梟張拳擊捧首
似與暴謔意態全當正大鬼按膝坐三鬼帶鞮一執旗
操刀擐囊力指督怒髮上直筋舊纏虎尾人身又踣顧
蒺藜短挺金鎚堅高下尊卑二十四二十四鬼無黃泉
角錐竟強欲何睹曷不各各還荒埏

送制置發運唐子方學士

本以諫諍稱今以財賦用所為各有能何必於茲重東
南周萬里海陸竭煮種斂之為公上豈是與民共民方
苦久弊將缺太平頌有利得設施無不可抑縱大都守
繩墨曷異虱處縫從來許國心曾未苟祿俸願無輸羨
餘終亦歸侍從

次韻和司馬學士慮囚

縲囚往慮問勤恤意不息猛虎在陷穽挑尾尚求食常
憂有註誤非罪罹暴迫藹藹萬乘都憧憧四方客一遭
纖微豐鑑垢莫磨拭是以大君心惟恐橫抵摘前法著
以律後法編以冊每當炎蒸時獄器用刷滌應無古冤

血地下化為碧我今因牽吟聊以肝膽瀝刑人皆得辜
不似尤地脈間歸即解鞍浣手嫌控勒昔言善烹魚必
先溉釜鬲願言保競慎切勿厭此役夜月可留翫清尊
可獨適一榻寬且平群動都已寂可用休其勞不休庶
終夕

和吳沖卿江鄰幾二學士王景彝舍人秋興

我謂蓬瀛客清切不畏炎及觀秋興篇無遠此窮閭乃
知天地大節候無愛嫌寒不為富減暑不為貧添向者
遭蒸炊靡不同炮燂西風吹雨至涼氣何纖纖霈然沃
萬物不更畢宿占紈扇捉苦倦盤冰得仍厭蠅癡驅又
來蚊噉喙猶尖絺衣不復浹醅醪壓初甜客有憎壁蝎

吳詩客有困韡檐

江詩

一以磔為喜一以嬾自謙唯有螭頭

人朝立宮殿簷盛誇樓觀高又極星斗瞻

王詩

予慙異羣

公歸意如陶潛自念菊將拆復思禾可鎌春禾作釀熟
獨邀影與蟾此樂雖易有彼榮安得兼

送覺上人歸湖州

富相國與紫衣

古寺一盂飯弊衣三歲塵相應維帝祝子已得袍新范
叔復何望原生甘自貧歸看五湖上終有泛舟人

送閔郎中知池州

一送池陽守頗懷當日遊青山臨岸盡翠水入江流楚
舊茅為貢燕來鴈報秋牧之登覽處故事待君修

和吳沖卿學士省中植菊

園果未熟實未墜野卉已老葉未瘁菊叢是時方發榮
潭上籬邊俱有為一從潭島輔長年一自籬根圖暫醉
今將移近省中蘭壅培早與陶潛異黃土肥濃沃井泉
朱欄屈曲侵階地勁風不到何動搖清露能霑誰著意
看看重九各登高金盞滿頭無所忌及此頻邀同舍歡
向來莫羨鍾繇賜我家蓬藿不足云強對嘉章顏起愧
張仲通追賦洛中雜題和嘗歷覽者六章

伊川

山斷瀉伊流灘聲朝暮急東渡馬將登西堤人已立日
看東西舟爭塗如不及誰見捕魚郎寒蓑雨中濕

洛州

上陽宮樹影不隨寒波流。天津橋下石激響無時休。至清自照物。遇險豈能柔。東過白馬去。凡經幾千秋。

潛溪

寒溪隨山迴。脩竹隱深寺。頗逢老僧談。能憶先到事。白

枯暝君憐。緋花土人蒔。不到三十秋。依稀猶可記。

真宗嘗駐蹕白

枯樹下花譜有潛溪緋一品

石樓

山腰古石樓。杳藹石梯上。低窺巖際樹。對見龕中像。簷中嵩雲飛。檻逼伊湍響。同遊已零落。歲月成俯仰。

大字寺

庭中兩大樹。池上千竿竹。竹有紅淚斑。樹無衆鳥宿。昔

日白傳歸。愛吟裴令續。閒流水西園。翻然入他族。

蘄竹

顛肥節腦瘦。蘄水長笛材。洛陽袁氏塢。此竹舊移來。雪霰飽已久。竅星誰為開。與君作龍吟。吹發江南梅。

次韻任屯田感予飛內翰舊詩

二十四年君日哦。翰林風韻郢中歌。歲華荏苒都如昨。世事升沈亦苦多。燕國駿蹄猶待樂。荆山美寶已逢和。賸求海內多何用。爛醉人間理莫過。歷覽昔賢皆泯泯。尋思魯叟自波波。我今不敢希高躅。蹇步年來任跌跎。

次韻荅德化尉郭功甫遂以送之

江南有嘉禽。乘春弄清吭。流音入我耳。慰愜若獲貺。朝

聽已孤高暮聽轉幽曠何多燕雀羣聲跡不相傍始聞
汾陽生文行衆所諒獨哦青山間悼古或悲愴弃官不
屈人頗學陶元亮是時予愛之顏采莫得望倏然能見
過遠涉丹湖浪袖攜一卷詩行橐更無長固與俗人殊
於焉識敦尚嗟嗟二千石不知子所向駭子發論高萬
仞聳孤嶂又如決河湍捧土安可障吾方歎瓌材恨未
逢良匠信哉騏驥駒誰用伯樂相自從昔還朝汨汨走
俗狀未嘗寄子書子言今行行亦似昧相知曾非事高
閑把筆誠不勤強意乃為妄茲晨去湓城聊以和子唱
子辭猶瀑布敢挹不知量

送李師錫太博通判懷州

洛陽古道登北邙河內碧山橫太行朝騎快馬暮可到
風物人心皆故鄉竹林無蹤懷阮籍路傍有家嗟宣王
別乘差同二千石教民唯在親耕桑

送潘士方建昌

軍壘近仙山麻源第三谷靈運詩亦存魯公記可讀幸
時無寇攘閑日望雲木儻見西王母白麟如白鹿來尋
鳥爪人神先生石屋無念癢背搔還恐懼怒扑學道我
未成鍊氣不飽腹安得羽翼生上下同黃鵠送君想君
遊星斗壇邊竹

次韻和吳仲庶舍人送德化郭尉

蒲葉高帆十二幅秋風逆水滿檣開是時不畏浪頭起

到日定將船尾堆。用捨東方言。虎鼠賤。疎梅福比蒿萊。
少年才辨無如美。廬岳峰前莫滯迴。

和劉原父舍人樂郊詩

太守東平來固殊。阮步兵。步兵醉乘驢。太守整佩纓。事
物既已遺。駕車出東城。園荒久不治。道路生棘荆。地僻
人馬入。草間狐兔驚。舊池堙猶穴。遺址歸不平。穴者使
之濬。歸者使之營。博野高榭起。陳漁危臺成。榭前東山
秀。臺下盧泉清。倚塢梧竹密。翳水芹藻并。渠渠有深堂。
燕賓飛玉觥。芍藥廣陵美。謔贈鄭女情。公子莫言歸。古
人未以輕。欲知學山簡。倒載去。敬傾。

送張聖民學士知登州

慕君才行美風義。亦倜儻在遠恨。未逢既近不屢往。非
以近為輕。恃易遂成曩。倏為東牟守。別我駐征鞅。又作
千里遙。依然復懷想。昔聞之罘山。秦碑元有兩。一存東
頂中。一在西頂上。篆實丞相斯。缺剝不可仿。願言試歷
覽。聞見欲以廣。海晴望石橋。神仙事懔怍。始皇安得長
陰。怪役固象橋。斷水無涯馬。知有方丈邇者地。出金發
掘壞沃壤。良民皆逐末。茲事誰用長。凡為二千石。唯在
勸耕紡。幸君經術高。教化人所仰。

送王言秀才歸建昌

來時槐開花。去日木隕葉。作賦未得薦。著書已盈篋。舊
居近仙壇。獨往遇農饁。莫問鳥爪人。欲取月桂捷。

次韻和劉原甫遊樂郊贈同遊

積歲阻顏色何以慰我思聞初遊樂郊頗慕登望詩下車未幾日倏見白露滋月弦不常滿星畢屢已離幸無風雨晦時從寮案嬉大喜酒客難莫顧尚書期獨守詩書愚未悟朝夕疲引領君子風東首自忘移但當觀魚鳥辟去旄與麾優悠民亦康何必苦吏為

次韻和王尚書荅贈宣城花木瓜十韻

百果各甘酸或由人所植木瓜聞衛詩贈好非玉色投此瓊玖報蓋重車馬飾貴賤今既殊凌紙字翕絕一一如明珠自得見安格復何備國風庶亦見王澤捧之為重賜誦已乃忘食幸資藥品用少助宣調力南土加文

章中州異肥瘠公將和鼎餼微意願尋繹

九月晦日謁韓子華遂留邀江鄰幾同飲是夕值其內宿不終席明日有詩予次其韻

乘興驅車偶一來旋呼江老舊遊陪驚風送雨寒初動舉酒浮蛆撥不開騏驥鞞時聞內宿琵琶彈急怨虛催接羅帶去令傳樣自此逢歡未便迴

送王省副寶臣北使

紫服黃金帶銀鞍翠錦韉犯寒辭漢省持禮入胡天左袵通華語名王接右賢舊山迴可記碣石與燕然

送李學士公達北使

萬里使窮域山川入馬蹄馳鳴沙水凍鵬擊雪雲低食

飲羊兼酪供迎虜雜奚禮成迴近日喜聽早朝雞

送祖擇之學士北使

燕山常苦寒漢使涉窮臘路長人馬愁風急沙霰雜宿
造羶廬開行逢獵騎合獻鮮禿髮馳問譯華言荅每食
冰生盤欲飲酒凍榼見其酋長時國禮何勤納中朝厚
仁恩四海望閭闔乃知日月光照必蠻夷匪歸來易輕
裘賜對延英閣

送許璋監簿歸泰州

木枯鳥不巢泉涸魚不游我非魚鳥情貧縛路阻脩高
陽有令子嗣世學已優前日來京城問恤忍涕流今失
王府薦命奇言非讎家聲喜未墜辭我還海陬為酌一

壺酒敘懷心如抽子之伯父歿遣奠固莫由豈欲寡恩
義力薄難置郵因寄綠睫淚灑向君衣裘

送棣州唐虞部

人持左符去馬逆北風行古路草初白大河冰未成暖
科桑柘美寒織杼梭鳴風俗已如此鵝棠無訟爭

金陵有美堂

李白愛山如洛陽三盃為歌愁日長廢基臺殿不可識
玉燕舊棲王謝堂公來碧瓦起棟宇羅列圖畫牙作牀
池頭古月城下江照見萬里冰雪光江流不盡月不死
寒浪素影東西翔願公樂此殊未央慎勿區區思故鄉
送張中樂屯田知永州

畏向瀟湘行不入洞庭去鞍馬踏關山衣裘冒霜露零
陵三千里楚俗未改故王澤久已覃國刑亦當措皆聞
柳宗元山水尋不飲其記若丹青因來問潭步石燕飛
有無香草生觸處仙姑異麻姑歲月樓中度不食顏渥
赭言語神靈預莫將車騎喧獨往探幽趣有信報我知
惡欲驅塵慮

宛陵先生文集卷第五十八

陽武王安之寄石榴

宛陵先生文集卷第五十九
安榴若拳石中蘊丹砂粒割之珠落盤不待蚊人泣舊
友大河濱作宰實畿色嚴霜百果熟為贈忽我及始時
童稚嬌爭取猴猿集老夫所食微何暇更收拾聊答君
意勤作詩恨短澀

寄致仕余少卿

仕苦戀朝廷多為老所逼朝廷雖愛賢不欲竭其力君
歸頗得宜湖上遂偃息男能智自謨孫亦俛就職人事
當置之自可樂胷臆

和吳沖卿學士冬日私居事

人知何晏宅。近住白楊頭。車馬不還往。詩書多蓄收。風
庭吹落葉。霜樹立鳴鳩。頗與市朝遠。閉門凡幾秋。

和吳沖卿葺菜

霜前收美菜。欲以禦冬時。備乏且增品。挑新那復思。菖
菹嗜西伯。薑食語宣尼。未免效流俗。竟將罌盎為。

依韻和王景彝學士紜宸仲冬早謁

朝開閭闔九重深。望拜珠旒照玉簪。霜氣稍迴龍陛峻。
日光微轉鳳樓陰。庭中細仗穿旗脚。案外薰爐對殿心。
我預千官少裨補。欲將歌頌播堯音。

依韻荅景彝謝予訪其居

日暮乘羸馬。因過太史家。竹窗談脫塵。槐樹暝棲鴉。邦

瘁稽前詠。人亡起彼嗟。夜分歸不寐。猶照角巾斜。其日聞石昌言

哀石昌言舍人三首十一月二日

朔日望顏色。衣冠朝帝閣。西靈未生魄。東岱已收魂。弔
哭新居啓。封題舊篋存。善人吾不見。何可問乾坤。
聖賢無不死。壽夭復何云。唯有名常在。其餘理莫分。朝
榮金玉寶。暮殞蕙蘭焚。今日寢門哭。緒言長絕君。
賈誼過秦畢。相如諭蜀歸。二人名既大。一日命何微。瘡
似烏常渴。災成鵬不飛。百年今已矣。冰結淚霑衣。

鄭州王密諫漱玉齋

渠渠梁照日。泯泯水分京。激作飛巖勢。流為雜佩聲。圖

書無近蹟草樹有冬榮景落人間處漂花出古城

書李學士北使集後

蘇武艱窮只四篇五言風格到今傳節旄盡落都無詠
枉在胡中十九年

送李學士河東轉運

重持使者節北上太行行未注螭頭筆來調塞下兵朱
轡邦伯至黃綬縣官迎臘雪臨關密宵烽出埃明山川
壯分晉戎馬說幽并此部多才俊其人不易輕

次韻和吳仲庶苗蔡二君村墅閒居

聞說江南庾子山下居泉石愛孱顏古來得喪何須問
世上榮枯只等閒高關浮雲徒有戀夕陽飛鳥亦知還

予貧不及三君子老愧朝紳進退閒

送良玉上人還崑山

來衣茶色袍歸變椹色服孤舟洞庭去落日松江宿水
煙晦琴徽山月上巖屋野童遙相迎風葉鳴椽榭

依韻和宋次道學士紫宸早謁

陸生聲譽在雲間來預簪裾謁帝顏冠劍有容夔與禹
文章全盛馬兼班耿耿玉宇龍纏棟藹藹金鋪獸齧環
却出常衙殿前過戟衣風動自相攀

和次道省中初直

江南太守歸夜直省中闈霜氣冷侵被月光斜入扉官
奴休執燭侍史正薰衣展轉不成寐幽懷吟更微

○去年宋中道自洛州以書令魏殊來謁予魏遂
託主第後辭歸予因中道之兄次道有孔雀賦
以送魏生

置從南海枕椰林。籠入西州鸚鵡地。聳冠翕翼脩尾張。
鱗鱗團花金縷翠。一身燦爛文章多。引聲笙竽奈遠何。
五侯池館不可戀。桂樹深枝自有窠。鳳皇樓頭饒燕雀。
入屋穿簾非爾樂。非爾樂。去何之。北方佳人或歌嘏。

依韻和宋中道見寄

歲在涖灘初別子。子適廣平裨郡理。廉頗臺傾有遺址。
今逢四方弓久弛。時不用兵皆樂鄉。念我貧居天子庠。
抱經臨案空循行。貌垢不洗顏蒼蒼。得時少壯相揄揚。

獨行無侶心泔浪。腸如轆轤轉井牀。內飢外寒膚粟芒。
若此煎炒何心腸。王都浩浩多球琅。懷珉安可爭焜煌。
舊朋升騰皆俊良。歿不發語生括囊。巍巍堯舜開明堂。
大調金石來鳳皇。鴛鴦戢翼方在梁。福祿其宜無不感。
已甘老死填溝隍。殭尸闔棺猶目張。仲尼生世尚徨徨。
豈能強聒爭蹒跚。未由見子舉以觴。北望大河衣袂攘。
牽牛橫漢不服箱。欲往乘車無可當。天駟有星名曰房。
又欲乘馬行幽荒。牛雖蹄瑩馬眼光。既不我駕路阻長。
我懷炳炳何日忘。半夜攬琴彈履霜。寫意緘辭無鴈將。
低雲作雪正蒼茫。

雷逸老以仿石鼓文見遺因呈祭酒吳公

石鼓作自周宣王。宣王發憤蒐岐陽。我車我馬攻既良。射夫其同弓矢張。舫舟又漁鱒鱣魴。何以貫之維柳楊。從官執筆言成章。書在鼓腰鐫刻歲。歷秦漢魏下及唐。無人著眼來形相。村童戲坐老死喪。世復一世如鳥翔。唯閱元和韓侍郎。始得紙本歌且詳。欲以氍毹歸上庠。天官媿阿駝。肯將傳至我朝一鼓亡。九鼓缺剝文失行。近人偶見安碓牀。亡鼓作白剝中央。心喜遺篆猶在傍。以白易白庸何傷。以石補空恐舂梁。神物會合居一方。雷氏有子胡而長。日模月仿志暮強。聚完辨舛經星霜。四百六十飛鳳皇。書成大軸綠錦裝。偏斜曲直筋骨藏。攜之謁我巧趨蹌。我無別識心傍惶。雖與乃父非故鄉。

少與乃父同。孟觴老向太學鬢。已蒼樂子好古親。縑箱誰能千載師。史倉勤此冷淡何肝腸。而今祭酒禪聖皇。五經新石立兩廊。我欲效韓非癡狂。載致出關無所障。至寶宜列孔子堂。固勝朽版堆屋牆。然須雷生往度量。登車裹護今相當。誠非急務須紀綱。太平得有朝廷光。山水大字輦已嘗。於此豈不同糝糠。海隅異獸乘舟航。連日道路費芻糧。又與茲器殊柔剛。感慨作詩聊激昂。願因諫疏投阜囊。夜觀奎壁正吐芒。天有河鼓亦焜煌。持比負鼎干成湯。

和宋次道真石昌言舍人

金羈白馬曉朝天。嘒管行車暮已傳。上帝樓成何遽召。

青霄路絕不應還。飄階隕葉聲淒若。隔幕孤燈夜寂然。
來奠一觴空湛湛。却思平昔淚漣漣。

和王景彝寄呂縉叔

白盡髭鬚史未成。不知能賦易登瀛。三冬足用腐儒飽。
千里從看跛鼈行。知有清名在公議。自無餘力到高閔。
磻溪八十猶垂釣。祖例推來亦後生。

依韻和宋次道荅弟中道喜還朝

白首謬陪兄弟閒。阿連初喜客兒還。池塘夢句君能得。
咳唾成珠我未閒。陋巷閉門誰扣扣。茂林飛鳥自班班。
歸來又接同袍會。月下朱闔不用關。

依韻和荅王安之因石榴詩見贈

當年仕宦忘其卑。朝出飲酒夜賦詩。伊川嵩室恣游覽。
爛熳徧歷焉有遺。是時交朋最為盛。連值三相更保釐。
謝公主盟文變古。歐陽才大何可涯。我於其間不量力。
豈異鵬搏萬鷄隨。見君弟兄入太學。俊譽籍籍聞一時。
而今兩鬢各已白。偶因贈酬言及斯。升沈是非休要問。
百歲歡樂誰能期。

陽武王安之寄兔魚

原上一雙兔。河中兩尾魚。兔皮空被褐。魚腹不藏書。長
跪置遠意。故人情何如。二物本潛伏。誰言置網疎。崢嶸
歲亦晚。將駕歸吾廬。

依韻和王景彝對雪

天雪霰成先暴集地中陽復已如期穿林陡覺繁風急
入袖初驚學舞遲樓上溫貂方貫酒竹間寒雀未辭枝
平明君向螭頭立玉座爐煙細細時

依韻和荅永叔洗兒歌

夜夢有人衣帔蛻水邊授我黃龜兒

生男前一夕夢道士贈龜一枚

仰看星

宿正離離玉魁東指生斗威明朝我婦忽在蓐乃生男
子實秀眉自磨丹砂調白蜜辟惡辟邪無寶犀我慙暮
年又舉息不可不令朋友知開封大尹憐最厚待酒作
歌來慶之畫盆香水洗且喜老駒未必能千里盧仝一
生常困窮亦有添丁是其子

重送祖擇之北使

文章世德已能傳得桂高枝二十年持節欲同蘇武勁
下帷曾似董君賢衣裘衽領無嫌左飲食盃盃暫厭羶
一過范陽應感槩歸來圖畫彼山川

題老人泉寄蘇明允

泉上有老人隱見不可常蘇子居其間飲水樂未央淵
中必有魚與子自徜徉淵中苟無魚子特翫滄浪日月
不知老家有雛鳳皇百鳥戢羽翼不敢言文章去為仲
尼歎出為盛時祥方今天子醒無滯彼泉傍

景彝率唐崇徽公主手痕詩

兩壁美人虹已收蒼崖纖手蘚痕秋和親只道能稽古
沉略從來不解羞漢月明明掌中照胡塵漠漠指間留

昭君歿後更多恨彈作琵琶曲未休

觀黃介夫寺丞所收丘潛畫牛

丘畫吳牛希戴嵩吳牛角偃彎如弓老牯望犂犢望母
母下平坡離牧童牧童吹笛坡頭坐古樹蕭騷葉戰風
黃君買畫都城中心不惜滿貫穿青銅賣從誰家不肖子
傳自幾世賢卿翁今時貴人所尚同竟借觀玩題紙窮
紙窮磊落見墨妙東府西樞三四公應識古人丹青蹟
又辨古人於物通一毛一尾不取次豈以後代為盲聾
願推此意佐國論况乃聖德同堯聰

題嘉興永樂院樵李亭

土化吳王甲骨朽越王兵五月菖蒲草千年樵李城蒲

根蛙怒嘍城上烏夜鳴吳越滅已久客心空屏營落日
孤亭間悠悠鐘磬聲

吳沖卿鼓契

猶是唐時契有司嘗欲昌耕上不許

暮契出朝契歸出入未嘗逢日暉雄雌曾不離鍾室百
年利弊知者稀時移世異不改易俗眼厭舊君前非君
王萬年千年壽獨憐古器與眾違昨日霜華厚如雪百
官凍鞞朝紫微吳王偷就温漏火始一識之增歎唏不
知逢逢六街鼓自此發號通帝關人間鍾鼓有多少多
少亂鳴誰肯譏

江鄰幾寄羊羝去歲為翊造者

細肋胡羊臥苑沙長春宮使踏霜羝蒺藜苗盡初蕃息

首荷盤空莫歎嗟自乏良謀甘更鄙猶能大嚼快無涯
磨刀為削朝霞片時引清盃興轉嘉

周仲章都官示卷因以贈之

赭白西北來本是天馬種朝秦暮至吳嵩華如歷冢伯
樂曾未逢垂頭牧青隴今朝顧我鳴振鬣耳聳聳聲生
秋風悲已喪荆軻勇誰牽駕鸞車高躡雲勢擁

宛陵先生文集卷第五十九

宛陵先生文集卷第六十

覽翠亭記

郡城非要衝無勞送還往官局非冗委無文書迫切山
商征材巨木腐積區區規規襲不為宴處久矣始是太
守邵公於後園池旁作亭春日使州民遊遨予命之曰
共樂其後別乘黃君於靈濟崖上作亭會飲予命之曰
重梅今節度推官李君亦於解舍南城頭作亭以觀山
川以集嘉賓予命之曰覽翠夫臨高遠眎心意之快也
晴澄雨昏峰嶺之顛也心意快而笑歌發峰嶺明而氣
象歸其近則草樹之烟緜溪水之澄鮮銜鱗翻來的的
有光埽黛侍側嫵嫵發秀有趣若此樂亦由人何則景

雖常存人不常暇暇不計其事簡計其善決樂不計其得時計其善適能處是而覽者豈不暇不適者哉吾不信也

林和靖先生詩集序

天聖中間寧海西湖之上有林君蘄蘄有聲若高峰瀑泉望之可愛即之逾清挹之甘潔而不厭也是時予因適會稽還訪於雪中其談道孔孟也其語近世之文韓李也其順物玩情為之詩則平淡邃美讀之令人忘百事也其辭主乎靜正不主乎刺譏然後知趣尚博遠寄適於詩爾君在咸平景德間已有大聞會天子修封禪未及詔聘故終老而不得施用於時凡貴人鉅公一來

相遇無不語合慕仰低回不忍去君既老朝廷不欲強起之而令長吏歲時勞問及其歿也謚曰和靖先生先生少時多病不媿無子諸孫大年能掇拾所為詩請予為序先生諱逋字君復年六十一其詩時人貴重甚於寶玉先生未嘗自貴也就輒棄之故所存百無一二焉嗚呼惜哉

紅鸚鵡賦

相國彭城公尹洛之二年客有獻紅鸚鵡籠之甚固復以重環繫其足遂感而賦云
蹠而毛翼而羽以形以色別類而聚或嘯或呼遠人而處在鳥能言有曰鸚鵡產乎西隴之層巒巢於喬木之

危端其性惠其貌安與禽獸異為籠檻觀吾謂此鳥曾
不若尺鷃之翻翻復有異於是者故得以粗論吾昔窺
爾族喙丹而綠今覽爾軀體具而朱何天生爾之乖邪
俾爾為爾類尚或弗取况爾殊爾眾不其甚與何者徒
欲謹其守固其樞加以堅鑠置以深廬雖使飲瓊乳啄
彫胡以充飢渴鑄南金飾明珠以為關閉又奚得於鳥
鳶之與雞雛吾是知異不如常慧不如愚已乎已乎

述釀賦

少居楚鄉楚多釀者故狷識酒之然夫酒之作也必良
其器必香其泉法式具舉酸敗罕旃取有豐約味有醲
泊則曰聖曰賢和神懌氣積日彌年自時厥後茲道寢
隳昔飲其醇今飲其醜昔也熙熙終日不亂舒暢四肢
今也冥冥迷魂倒魄不知其醒吾觀於世未始達此夫
以天下為壚鬯兆庶為梁米君臣為麴蘖道德為酒醴
酣仁漱義四海熏和莫知所以逮乎率土澆弊材不授
矣君臣乖異法不施矣道德遂薄酒弗飴矣舖詐啜偽
昏然而無歸矣安得滌其具更其術時其物清其室然
後漬以椒桂侑以棖橘吾將霑醉乎窮日

靈鳥賦

鳥之為靈者何噫豈獨是鳥也夫人之靈大者賢小者
智獸之靈大者麟小者駒蟲之靈大者龍小者龜鳥之
靈大者鳳小者烏賢不時而用智給給于為世所趨麟

不時而出駒流汗兮擾擾於修塗龍不時而見龜七十
二鑽兮寧自保其堅軀鳳不時而鳴烏鴟鴞兮招唾罵
於邑間烏兮事將兆而獻忠人反謂爾多凶凶不本於
爾爾又安能凶凶人自凶爾告之凶是以為凶爾之不
告兮凶豈能吉告而先知兮謂凶從爾出胡不若鳳之
時鳴人不怪兮不驚龜自神而刳殼駒負駿而死行智
鶩能而日役體劬劬兮喪精烏兮爾靈吾今語汝庶或
汝聽結爾舌兮鈐爾喙爾飲啄兮爾自遂同翱翔兮八
九子勿噪啼兮勿睥睨往來城頭無爾累

南有嘉茗賦

南有山原兮不鑿不營乃產嘉茗兮踞此衆氓土膏脈

動兮雷始發聲萬木之氣未通兮此已吐乎纖萌一之
日雀舌露掇而製之以奉乎王庭二之日鳥喙長擷而
焙之以備乎公卿三之日槍旗聳舉而炕之將求乎利
贏四之日嫩莖茂團而範之來充乎賦征當此時也女
廢蠶織男廢農耕夜不得息晝不得停取之由一葉而
至一掬輸之若百谷之赴巨溟華夷蠻貊固日飲而無
厭富貴貧賤不時啜而不寧所以小民冒險而競鬻孰
謂峻法之與嚴刑嗚呼古者聖人爲之絲枲締綌而民
始衣播之禾薺菽粟而民不飢畜之牛羊犬豕而甘脆
不遺調之辛酸鹹苦而五味適宜造之酒醴而燕饗之
樹之果蔬而薦羞之於茲可謂備矣何彼茗無一勝焉

而競進於今之時抑非近世之人體惰不勤飽食梁肉坐以生疾藉以靈薜而消腑胃之宿陳若然則斯茗也不得不謂之無益於爾身無功於爾民也哉

鳴鳩賦

時人謂鷓鴣癡拙禽也茲禽然癡且拙猶能以喙寫心布于辨音者焉曰我智不如燕鴈識氣候之早晚隨陽而來知社而返勇不如鷓鴣鷹鸇恣搏擊於秋天下無全物落不空拳惠不如鸚鵡鸚鵡入崇堂于蔭夏屋事言語以如人餌果梁而飫腹巧不如女匠挂巢室於枝上畏風雨之漂搖紕茅莠而密壯年不如鸛鶴紮羽毛於寥廓希霖雨而鳴垤和氣類而靡爵茲五者實無有

於羣鳥分馴馴於林表癡亦誠多拙亦不少雖不能趨暄暍之時亦毛翻而自持雖不能決爪吻之利亦飲啄而自遂雖不能弄喉舌之辯亦呼鳴而自善雖不能理窠之完亦棲處而自安雖不能適變赴情亦隨宜而自寧噫唯癡與拙天之所生若此而已矣又烏足爲之重輕

麈尾賦

野有壯麈兮懼虞人於廣原其身已殺其肉已燔其骨已棄獨其尾之猶存飾雕玉以爲柄入君握而承言聊指麾之可任雖脫落而蒙恩噫譬諸犬豕其死則均其肉與骨亦莫遠巡自古及今若此泯沒者日有億計曾

不一毫以利人是以生若蚍蜉死若埃塵生無以異於其類死不爲時之所珍故仲尼疾沒世而名滅子長亦著論而有因乃感茲獸而用告乎朋親

擊甌賦

余觀今樂愛乎清越出金石之間所謂擊甌者本埏埴異琳球入伶倫兮間齊優其可尚者鳴非瓦釜律度合鼓非土缶音韻周和非埴篴上下應作非鐘磬節奏侔而又冰質瑩然水聲修然度曲泠然入耳瀏然猶有非之者曰善則善矣未若豔女之歌喉何則是謂絲不如竹竹不如肉以其近自然之氣况此曾何參於樂錄之月乎余辯之曰融結合於造化堅白播於陶鈞發和於器導和於人可以樂嘉賓可以暢百神安得絲竹謳吟之匪倫也哉

哀鷓鴣賦

并序

余得二鷓鴣飼之甚勤既久開籠肆其意其一翩然而去其存者特愛焉鷓鴣於禽最有名頃未識也思持歸中州與朋友共玩之凡養二年呼鳴日善罷官至蕪湖一夕爲鼠傷死遂作賦以哀云

物有小而名著亦有大而無聞吾於禽類得鷓鴣兮不羣其音格磔其羽爛斑其生遐僻其趣幽閑飲啄乎水裔棲翔乎竹間往咨羅者求之於野生致二雛形聲都雅愛之蓄之籠之服之爲日已久言馴熟兮縱晞朝旭

一逸而不復兮謂之背德非我族兮戀而不去尤可穀
兮晨啼暮宿何嗟獨兮固當攜之中國為士大夫之目
兮不意孽鼠事潛伏兮破笈嚙嗉何其酷兮嗚呼翻飛
遠逝不為失兮安然飽食不為福兮焉知不為名之累
兮焉知不為鬼所瞰而禍所速兮哀哉誠不如禿鶻鴉
鵬兮凡毛大軀妖鳴飫腹何文彩之佳何名譽之淑前
所謂大而無聞其自保而自足者與

問牛喘賦

和人 鄧州六首

客有感前史問牛喘廣而賦義有由余得撫遺辭掇遺
韻索遺意而用以酬夫寒為冬燠為夏和為春肅為秋
和以發生則物萌而抽燠以長養則物盈而周肅以登

就則物實而收寒以閉結則物藏而休是則陰陽之道
順而燮和之職修若乃當春而燠是為行夏令而火侵
於木時則有雨水不降艸樹早落火訛相驚疾疫多作
故丞相當是月而見牛喘恐天令之愆錯問從來之遠
邇兮或力或嘆而可度匪賤人而憂畜實原微而意博
所以元化日調萬彙時若及其後世自我物自物天
自天人自人胡為乎冬胡為乎春孰謂差忒孰謂平均
曰吾委佩而端冕服美而食珍上奉天子下役烝民夫
何預於我哉我亦無媿於茲辰

凌霄花賦

厥草惟夭厥木惟喬草有柔蔓木有繁條緣根兮附質

布葉兮敷苗朱華粲兮下覆本榦蔽兮不昭嗟乎此木
幾歲幾年而至於合抱夫何此草一旦一夕而遂曰凌
霄是使藜藿蒿艾慕高豔而仰翹翹也安知蘋藻自潔
蘭蕙自芳芙蓉出汗而自麗芝菌不根而自長或紉珮
帶或采頃筐或製裳於騷客或登歌於樂章故得爲馨
爲薦爲嘉爲祥皆無附著亦以名揚奚必託危柯而後
昌吾謂木老多枯風高必折當是時將恐摧爲朽芟不
復萌蘖豈得與百卉並列也耶

矮石榴樹子賦

并序

襄城縣庭下生矮石榴往來者異之余作賦寫其狀因
以自勵云

有矮石榴高倍尺中訟庭麗戒石訪諸走胥云非封植
忽此生榮三傳歲曆密葉如蓋繁條如織萎蕤下垂疲
軟無力緗苞貯露纍纍仄仄下人俯視顛本可識雀媿
卑棲而不肯集兮故啾唧以矯翼偃偃盤盤若屈若鬱
紉紉結結非曲非直榦不足攀陰不足息夫何挺質之
可惑耶意爲異與爲妖與人以爲異我不知其異曰殊
衆人之類類人以爲妖我不知其妖曰乖衆木之翹翹
然而不生樊圃臺榭遊觀之所產茲堂下其有以警而
有以覩因形戕義庶將有補當革蔓衍之多枝無若輓
柔之不舉勿俾苞苴之流行勿使吏氓之輕侮勿渙忍
以自抑勿猶豫而失處勿闡茸以接卑勿上下之不撫

夫如是則異也妖也固弗取維戒懼斯主

風異賦

并序

庚辰歲三月丙子天大風壬午詔出郡縣繫獄死罪已
下夫風者天地之氣也猶人之呼噓喘吸豈常哉若應
人事之變則余不知故賦其大略云

吾因迓勞適於郊憩亭舍日昃時群輩外囂曰火來音罹
火來喔呼噫噉出屋遠望西北之陲亘天接地混混赫
赫不見端涯逡巡則赤埃赭霧突盪奔馳陽精失色白
晝如晦號空吼穴揚砂走塊衆心驚惶廣衢翳昧莫辨
誰何執手相對其少頃也稍明故歸人未寧兮相與而
為隊順前者措足之不暇逆進者舉武而愈退睇山川

兮安陳趨城郭兮安在所可視者五六步之內越翼日
四方恬霽乾坤黯慘物色憔悴牛復馬還絕銜鼻艸靡
木折莢實墜禽鳥墮死泥滿喙几案傾欹塵覆器民廬
毀壞商車顛躓既而衆曰此何景也伺彼往來兮問遠
邇之所自或曰起浚都播許鄭歷洛汭以及唐鄧漢隋
之地稽厥時厥狀無與此土異未迨旬浹德音遐暨是
知本聞之不僞聊綴辭也若此言變咎則非愚者之能
議

乞巧賦

孟秋七日夕戶未扃余歸自外見家人之在庭列時花
與美果祈織女而丁寧乞天巧之付與惡心手之鈍冥

余既寢而弗顧又烏辨乎列星兒女前曰故事所傳餘千百齡何獨守拙迷猶未醒遂起坐而歎曰吾試語汝汝其各聽夫芒忽之間變而有氣氣而有形形而有生生而有靈愚愚慧慧自然之經賦已定矣今反妄營則何異高山之目兮不能守枝葉之亭亭欲戕而為犧象兮利塗飾乎丹青且復天巧與人巧將不同也天孫又安得此而輒私天之巧者總陰陽運四時懸日月星辰而不忒其璇璣鼓雷風雨雪而不失其施生萬物死萬物而物得其宜此天之所以任大巧而不虧人之巧者非它直心口手足也心巧於慮口巧於詞手巧於技足巧於馳亦各有極不可強為故慮之巧不過多智謀使

爾多謀多智則精驚而魄離詞之巧不過多辯言使爾多言多辯則鮮仁而行遺技之巧不過多能藝使爾多能多藝則藝成而跡卑馳之巧不過多履歷使爾多履多歷則速老而筋疲如是則吾焉用而乞之吾學聖人之仁義尚恐沒而無知肯乞世間之輕巧以汨吾道而奪吾之所持吾決守此而已矣爾勿吾疑

思歸賦

祿有可慕祿有可去何則移孝為忠曾無內顧則祿可慕而可據上有慈顏以喜以懼故祿可去而不可寓噫吾父八十母髮亦素尚爾為吏夏焉遐路嗷嗷晨烏其子反哺我豈不如鬱其誰訴惟秋之氣至慘慄而感人

日興愁思側睇江濱憶爲童子當此凜辰百果始就迭
進其珍時則有紫菱長腰紅芡圓實牛心綠蒂之柿獨
苞黃膚之栗青芋連區烏稗五出鴨脚受彩乎微核木
瓜鏤丹而成質素乳之梨蘋壺之橘蜂螭淹醯榼漬
蜜膳羞則有鷓鴣野鴈澤鳧鳴鶉清江之膏蟹寒水之
鮮鱗冒以紫薑雜以菱首觴浮萸菊俎薦菁韭坐溪上
之松篁掃門前之桐柳僕侍不譁圖書左右或靜默以
終日或歡言以對友信吾親之所樂安閭里其茲久切
切余懷欲辭印綬固非效淵明之褊衷恥折腰於五斗
蓋自成人以及今未嘗一日侍傍而稱壽豈得不決去
於此時將恐貽恨於厥後

鬼火賦

放舟於穎水之上夜憩於項城之野陰氣四垂而雨微
下左右望之若無覩者有光熒然明於水邊人皆謂之
鬼火吾獨未爲然焉噫謂鬼爲無吾不敢謂之無謂鬼
爲有吾不敢謂之有但觀韓氏之言舊矣曰鬼無形鬼
無聲旣無聲與形又安得此而明嘗聞巨浸之涯百物
皆能發光而吐輝又草木之腐亦能生耀而化飛爾知
彼是而此非曰若電者因形乎因勢乎苟因形因勢則
此何疑而弗及嗚呼昔人有論電者陰陽之氣相薄而
成何須形勢將就此妄名謂爲物光可也謂爲鬼火則
吾不敢聽

鬼火後

吾既為鬼火賦客有謂余曰嘗觀舊說鬼火曰燐前人
有述子何不信言未畢余遽辨曰爾不熟究吾旨耶吾
豈忽而不知且聞兵死之血久而化之既云血化安有
鬼為比夫艸木之腐固合其宜宜曰物光又豈為過此
論確如牢不可破尚恐未然更聽吾言彼熒熒者胡可
以烹煎彼熒熒者胡可以燠暄彼熠熠者胡可以炎上
彼熠熠者胡可以燎原蓋無此並蔓說徒繁客慚忸無
辭而起余方掩乎衡門

魚琴賦

并序

丁從事獲古寺破木魚斲為琴可愛玩潘叔冶從而為

賦余又和之將以道其事而寄其懷

為琴之美者莫若梧桐之孫枝夫其生也附崖石遠水
涯陰凝其腋陽削其皮曾亡漫戾而沈實之韻資噫始
其遇匠氏也有幸不幸焉故未得盡厥宜其於不偶若
陷於夷剗中刻鱗加尾及髻宛然而魚日擊而椎主彼
齊衆之律令則聲聞囂爾而四馳粵有好事者竭來睨
之取為雅器製擬庖犧徽以黃金絃以縶絲音和律調
乃升堂室嗚呼琴兮遇與不遇誠由於通窒始時效材
雖甚辱兮於道無所失今而決可以叅金石之奏焉無
忘在昔為魚之日

針口魚賦

有魚針喙形甚小常乘春波來不少人競取之一掬不
重乎銖抄其爲針也穎不能刺肌膚目不能穿絲縷上
不足以附鑿而愈疾下不足以因工而進補以口得名
終親技女大非膾材唯便鮓滷烹之則易爛貯之則易
腐嗟玉色之可愛聊用實乎雕俎過此已往未知其所
處

靈鳥後賦

靈鳥我昔閱爾之忠告人之凶遭人唾罵於時不容覆
巢彈類驅逐西東余是時作賦以弔汝非乘爾困而責
爾聰今也主人悟彈者去豐爾食於太倉置爾巢於高
樹晨鷄不鳴百鳥爭慕傍睨鳳皇下窺鵠鷺爾於此時

徒能縱蒼鷹逐狡兔不能啄叛臣之目伺賊壘之去而
復憎鴻鵠之不親愛燕雀之來附旣不我德又反我怒
是猶秦漢之豪俠遠已不稱昵已則譽夫然吾分足而
已矣又焉能顧

宛陵先生文集卷六十終

右宋都官員外郎宣城梅堯臣聖俞宛陵集六十卷
今宣城太守袁旭廷輔所重刻也何為刻之表先賢
以儀後進者太守職也始宣城郡政久弛袁君至單
志竭慮蕪茲滌穢暮歲之間橫民以戢良民以安修
舉學政爰興教化表章先賢風勵多士於是修都官
之墳率學諸生行展謁之禮而詢求其文蓋郡人莫
或知者及訪都官之後始得此編遂刻以傳聖俞當
仁宗朝與韓范富歐諸公游聖俞詩名特盛於時最
初王文康公曙覽之歎曰三百年無此作矣而見知
歐公尤深相與尤密時蓋有擬歐梅於韓孟者非宣
城山川靈秀之所鍾歟今天下學士君子皆知聖俞

宛陵文集題
為宣之傑出顧宣之人有不能如此袁君之心所不容已也聖俞平生所著又有唐載廿六卷詩小傳廿卷注孫子十三篇又嘗編修唐書此亦後來宣之人所當知也因并及之正統己未冬十一月乙巳朔光祿大夫少師兵部尚書華蓋殿大學士廬陵楊士奇題

余被命來守宛陵視事之翌日有客謂余曰郡學請鏤版印書公留意否乎乃問其目曰梅聖俞詩集自遭兵火殘編斷簡靡有全者幸郡教官有善本余樂聞而應之曰昔龐參為漢陽太守郡人任棠有奇節參到先候之棠不與言但以薤一本水一盃置戶屏前抱兒伏於戶下參思其微旨曰水欲吾清拔薤欲吾擊強宗抱兒當戶欲吾開門恤孤率而行之漢陽大治余殿此邦之初學官諸生以學校為言今客又以聖俞梅公詩集為言客其吾之任棠也與聖俞公以詩聞於當世寔此邦之前哲客其欲余先庠序之教而借梅文以為諭余固淺陋雖不足以發揚幽光敢不率行或庶幾乎如漢陽

之治也乃命學官董其事鏤版既成請序於余余豈敢
辭聖俞公之詩簡古純粹華而不綺清而不癯涵泳於
仁義之流出入於詩書之府而其工歐陽文忠公已序
於集首此不復道姑敘鏤版之由云爾紹興十年上元
日檢校少傅保信軍節度使知宣州軍州事兼管內勸
農營田使新安郡開國公食邑五千二百戶食實封二
千一百戶汪伯彥後序

宛陵先生文集拾遺

得餘干李尉錄示唐人干越亭詩因以寄題

餘水之干越之鄙築基相對琵琶尾琵琶日日有秋聲
鴈過洞庭風入葦南斗夏湖波不起長刀剡峰碧耳耳
姱娥夜出在寒谿青銅瑩磨光幾里朝因吳客幅蒲輕
滿紙如蠶書可喜

送君石祕校尉河內

古縣太行下老槐三四株以言新作吏不似舊爲儒黃
綬心猶壯青雲志豈無漢朝吾遠祖不道此官麤

雙羊山會慶堂記

余以附城之地勢勝神靈所栖故建閣曰寶章以嚴帝

書爲堂曰會慶以安吾先君先叔畫像有僧澄展願歲時奉香火澄展先叔於其有恩雖然抑之不育背本堂之前許其置佛俾報恩奉佛兩得焉况吾之親域在其右欲因以固護初余一發意吾鄉孝子義士咸助以資噫愛人之愛親者知其有親也不愛人之愛親者知其不有親也不有其親則孟子所謂慕少艾慕妻子慕君者歟余老矣慕親而不可得見見墳旁之草樹不敢慢常若吾親髣髴在其下唯恐令傷一草樹切切焉不忍去欲常居此則業爲王官欲致爲臣又無以自給僧能專事藉以守之守之必精潔其宇無令棄俗趣而樂處之余之存心者此耳堂之經畫始終由吾里人張景崇

景崇力爲之者愛吾有其心以吾貧不能自爲也衆人亦由景崇然後從而愛之愛他人之愛親者於其親可知矣吾不得不書以示後人知吾鄉之多禮義又書其姓于石陰至和二年八月初吉宛陵梅堯臣記



程